



Mi vevin simpri dite che par un zago, rivâ a puartâ il turibul al sarès stât il top. Chest al voleve dî ancje une altre robe: si jere diventâts capo-zago. Sì, parcè che dome un capo-zago al podeve cjapâ sù e niçulâ chel argagn, dut lusint, come di arint. E no dome. Cuant che tu jentravis in glesie, o pûr jentrant da sacrestie, tu jeris il prin da la schirie di zagos, il plui impuartant, chel che al puartave un imprest di benedizion. Insome tu jeris chel cul turibul. Un ricognossiment!

E cussì o vevi fate la mê scjale viers il sucès. Fin di piçul o stevi dongje dal predi e no fasevi nuie. Po dopo o soi passât cul façolet, e jenfri l'an di seconde elementâr, dret viers las ampoles di aghe e vin. Eco, rivâts li, si podeve polsâ, come se la scjale a vês une plane. Za las ampoles a jerin un bon travuart.

Intal zâr di un altri an, si passave a las torces, chês che a stan dongje l'altâr maiôr. Passade cheste tape, si rivave in curt ai cjandelîrs. Chei a permetevin di vê une buine visibilitât, a stavin intune buine posizion dilunc la procession e, ancje lôr a jerin lusints, come di arint. Ma soledut a jerin la ultime plane das scjales dal sucès. Cumò a restavin dome cuatri pas viers il turibul.

La prime volte che o ai cjapât in man il turibul, e cui che lu cognòs al sa che nol è tant facil a prin colp, scuasit mi colavin las lagrimes. O jeri content come un frutut cun las saches plenes di cjariseses.

Eco alore rivât su la spice: capo-zago e "manovradôr" di turibul. Mico scherçs! E dongje di me, il gno plui cjar amì, pront a vierzi la navisele cun dentri l'incens.

La prime messe al è stât dificil, la seconde za miôr. Intal zâr di pôc, o vevi imparât dut ce che

al coventave: cemût impiâ las cideles di cjarbon, trop incens meti parsore, cuant vierzi o sierà il bocheton. Cuant passâlu al plevan e cuant jessi pront a cjolilu, cuant fâ il zîr da l'altâr e cuant inzenoglâmi sui scjalins da glesie, salacor cun i bregons curts sot da vieste.

E mi visi ancjemò trop che si zuiave a gjespui, cuant che par benedî l'ostensori, il gno amì al jemplave las cideles di incens, fasint fum par dute la glesie e intosseant las vecjutes daûr di nô.

Ma pôc mi interessave. Cumò o jeri chel cul turibul.

di Massim Furlan